

## A M E R I K A T I K

Chori kabi-gabea  
 ¡Bai dala ¡bai! tristea!  
 ¡Bai dala mingarriya!  
 ¡Dala negargarriya!...  
 Urrun sort-erritikan  
 Lagun gabetanikan  
*¿Ene biyotza, nola,  
 Nola daite konsola?*

Nere jayot-echen,  
 Zelai lorez betea,  
 Zugazti gereizduna,  
 Mendiska belarduna,  
 ¿Non dira gaur, non dira?.  
 ¿Nora nago begira?...  
*Ene biyotza, nola,  
 Nola daite konsola?*

¡Zér gozotasunean  
 Bizi nitzan echeari!  
 Emen gaur tristerikan,  
 Eta ¡zéiñ bakarrikan!  
 Penaz inguraturik,  
 Atsekabez urturik,  
*¿Ene biyotza, nola,  
 Nola daite konsola?*

Malkozko iturriyak  
 Dira nere begiyak,  
 Eta nere malkoak  
 Sua beziñ beroak.  
 Dago nere barrua  
 Minduraz ornitua;  
*¿Ene biyotza, nola,  
 Nola daite konsola?*

Onera etortzea  
 Zala Zeruratzea,  
 Oso sinistu nuen:  
 Amerika jo nuen.  
 ¿Zér arki det?... gosea,  
 Bizi miñez betea:  
*¿Ene biyotza, nola,  
 Nola daite konsola?*

¡Ai nere mendiyetan!  
 ¡Ai nere bazterretan  
 Baneuka chabolchoa,  
 Nere kabichuloa!  
 Ez dedan bitartean,  
 Urrun nagoenean,  
*¿Ene biyotza, nola,  
 Nola daite konsola?*

Billa beza urrea,  
 Danak diruzalea:  
 Neretzat naiyago det,  
 Askoz maiteago det,  
 Gozotasun laztana,  
 ¡Gaur ¡ai! ez daukadana!  
*¿Ene biyotza, nola,  
 Nola daite konsola?*

Istingak iturrira,  
 Iturriyak ibaira,  
 Ibaiyak itsasora,  
 Ni sort-erri gozora  
 Noa... gogoarekin,  
 ¡T' eziñ gorputzarekin!  
*¿Ene biyotza, nola,  
 Nola daite konsola?*